

Na osnovu člana 16., 61. stav (1) i (2) Zakona o upravi ("Službeni glasnik BiH", broj 32/02 i 102/09), člana 14. stav (1) i stav (3) tačka a) Zakona o zrakoplovstvu Bosne i Hercegovine ("Službeni glasnik BiH", broj 39/09), generalni direktor Direkcije za civilno zrakoplovstvo Bosne i Hercegovine donosi

PRAVILNIK

o

organizaciji i sastavu odbora za žalbe Europske agencije za zrakoplovnu sigurnost

Član 1.

(Predmet)

Ovim Pravilnikom utvrđuju se pravila organizacije i sastava odbora za žalbe Europske agencije za zrakoplovnu sigurnost.

Član 2.

(Područje primjene)

Ovim Pravilnikom primjenjivat će se Dodatak I uz ovaj Pravilnik.

Član 3.

(Pojmovi)

(1) Pojam "ECAA sporazum" označava Multilateralni sporazum između Europske zajednice i njenih država članica, Republike Albanije, Bosne i Hercegovine, Republike Bugarske, Republike Hrvatske, Bivše Jugoslovenske Republike Makedonije, Republike Island, Republike Crne Gore, Kraljevine Norveške, Rumunije, Republike Srbije i Misije privremene uprave Ujedinjenih nacija na Kosovu (u skladu sa Rezolucijom Savjeta bezbjednosti UN 1244 od 10. juna 1999.) o uspostavljanju Zajedničkog europskog zrakoplovnog područja.

(2) Pojmovi "Zajednica", "propisi Zajednice", i "država članica" koji se koriste u dodatku ovog Pravilnika tumače se saglasno tačkama 2. i 3. Aneksa II ECAA sporazuma. i stavu (2) člana 3. Protokola II, Aneksa V, ECAA Sporazuma.

(3) Pojmovi "nadležni organ", "nadležni organ države članice", „nacionalna tijela za civilno zrakoplovstvo“ i "nacionalna civilna zrakoplovna vlast" koji se koriste u dodatku ovog Pravilnika tumače se kao Direkcija za civilno zrakoplovstvo Bosne i Hercegovine (BHDCA).

Član 4.

(Nadležnost za provođenje Pravilnika)

U smislu provođenja Uredbe iz Dodatka I ovog Pravilnika nadležna je Direkcija za civilno zrakoplovstvo Bosne i Hercegovine, u okviru nadležnosti koje ima na osnovu Zakona o zrakoplovstvu Bosne i Hercegovine ("Službeni glasnik BiH", broj 39/09) i ovog Pravilnika.

Član 5.

(Dodatak)

Dodatak I ovog Pravilnika je Uredba EZ broj 104/2004 od od 22. januara 2004. koja propisuje pravila u pogledu organizacije i sastava odbora za žalbe Europske agencije za zrakoplovnu sigurnost (Tekst od važnosti za Europski privredni prostor).

Član 6.

(Tumačenje)

U slučaju nejasnoća u tumačenju i nedostataka odredaba ovog Pravilnika koristit će se tekst Uredbe iz Dodataka I ovog Pravilnika na engleskom jeziku, kako je objavljen u Službenom listu Europske Unije.

Član 7.

(Stupanje na snagu)

Ovaj Pravilnik stupa na snagu osmog dana od dana objavljivanja u „Službenom glasniku Bosne i Hercegovine“.

Broj: 1-3-02-2-124-1/10

Banja Luka, 27.01.2011. godine.

Generalni direktor

Đorđe Ratkovića, s.r.

Službeni glasnik BiH broj 20/11 od 21.03.2011.

DODATAK I

UREDBA KOMISIJE (EZ-a) br. 104/2004

od 22. januara 2004.

koja propisuje pravila u pogledu organizacije i sastava odbora za žalbe Europske agencije za zrakoplovnu sigurnost

KOMISIJA EUROPSKIH ZAJEDNICA,

uzimajući u obzir Ugovor o osnivanju Europske zajednice,

uzimajući u obzir Uredbu (EZ-a) br. 1592/2002 Europskoga parlamenta i Vijeća od 15. januara 2002. o zajedničkim pravilima u području civilnog zrakoplovstva i kojom se osniva Europska agencija za zrakoplovnu sigurnost ⁽¹⁾, kako je posljednji put izmijenjena i dopunjena Uredbom Komisije (EZ-a) br. 1701/2003 ⁽²⁾, a posebno njen član 31. stav 3. i član 32. stav 5.,

budući da:

(1) Uredba (EZ-a) br. 1592/2002 ovlašćuje Europsku agenciju za zrakoplovnu sigurnost (Agencija) da donosi pojedinačne odluke u područjima plovidbenosti i potvrda o sigurnosti plovila za okoliš, istraga poduzeća te plaćanja primjenjivih taksa. Ona također uspostavlja i odbor za žalbe kojem se mogu podnositi žalbe na navedene pojedinačne odluke.

(2) Članovi 31. i 32. Uredbe (EZ-a) br. 1592/2002 ovlašćuju Komisiju da usvoji podrobna pravila u vezi s brojem odbora za žalbe, dodjeljivanjem posla, potrebnim kvalifikacijama članova svakog odbora i ovlaštenjama pojedinih članova u pripremnoj fazi odlučivanja te uslovima glasanja.

(3) Očekuje se da će broj žalba biti dosta ograničen sve dok se ne izmijeni i dopuni Uredba (EZ-a) br. 1592/2002 na način da se područje njene primjene proširi na letove i izdavanje dozvola posadi.

(4) Odbor će razmatrati predmete za koje je potreban visok stepen općeg tehničkog iskustva u području certifikacije. Uprkos tome odborom treba predsjedati član koji posjeduje pravne kvalifikacije te ima priznato iskustvo u međunarodnom pravu i pravu Zajednice. Taj bi član trebao biti predsjednik.

(5) Kako bi se pojednostavilo postupanje sa žalbama i njihovo rješavanje, za svaki bi pojedinačni slučaj trebalo imenovati izvjestitelja koji bi, *inter alia*, bio odgovoran za korespondenciju sa strankama te za pripremanje nacрта odluka.

(6) Kako bi se osiguralo efektivno djelovanje odbora za žalbe, u njegovom bi sastavu trebao postojati registar čije bi osoblje bilo odgovorno za obavljanje pomoćnih poslova koji nisu povezani s pravnim ili tehničkim ocjenama.

(7) Mjere predviđene ovom Uredbom u skladu su s mišljenjem Odbora uspostavljenog na osnovu člana 54. stava 3. Uredbe (EZ-a) br. 1592/2002,

(1) SL L 240, 7.9.2002., str. 1.

(2) SL L 243, 27.9.2003., str. 5.

DONIJELA JE OVU UREDBU:

Član 1.

Broj odbora

Radi odlučivanja o žalbama na odluke navedene u članu 35. Uredbe (EZ-a) 1592/2002 osniva se odbor za žalbe.

Član 2.

Kvalifikacije članova

1. Žalbeni odbor čine dva člana koji posjeduju tehničke kvalifikacije i jedan član s kvalifikacijama u području prava koji je ujedno i predsjednik odbora.
2. Tehnički osposobljeni članovi i njihovi zamjenici posjeduju univerzitetsku diplomu ili jednakovrijednu kvalifikaciju te imaju znatno stručno iskustvo u području certifikacije, u jednoj ili više disciplina navedenih u prilogu ovoj uredbi.
3. Pravno osposobljeni član i njegov zamjenik diplomirani su pravnici koji posjeduju priznato iskustvo u području prava Zajednice i međunarodnog prava.

Član 3.

Ovlaštenja predsjednika

1. Sjednice odbora za žalbe saziva predsjednik. Predsjednik se brine za kvalitetu i dosljednost odluka odbora.
2. Predsjednik dodjeljuje razmatranje žalbe jednom članu odbora kao izvjestitelju.

Član 4.

Uloga izvjestitelja

1. Izvjestitelj obavlja preliminarno razmatranje žalbe.
2. Izvjestitelj se brine za usku suradnju i razmjenu informacija sa strankama u postupku. Radi toga izvjestitelj:
 - (a) priprema saopštenja strankama ovisno o uputstvu predsjednika odbora;
 - (b) saopštava eventualne propuste koje stranka u postupku treba ispraviti;
 - (c) utvrđuje odgovarajuće vremenske rokove u postupku u skladu s članom 39. stavom 2. Uredbe (EZ-a) br. 1592/2002; te
 - (d) u ime odbora potpisuje sva saopštenja.
3. Izvjestitelj priprema interne sastanke odbora i usmene postupke.
4. Izvjestitelj priprema nacrt odluke.

Član 5.

Registar u sastavu odbora za žalbe

1. Izvršni direktor odboru za žalbe dodjeljuje registar. Osoblje odgovorno za rad registra ne učestvuje niti u jednom postupku Agencije vezanom uz odluke na koje se može uložiti žalba.
2. Osoblje registra posebno je odgovorno za :

- (a) vođenje registra, u kojem su hronološkim redom poredane sve uložene žalbe i dodatni dokumenti;
- (b) zaprimanje, posredovanje i pohranu dokumenata;
- (c) obavljanje ostalih poslova za odbor za žalbe koji nisu povezani s pravnim ili tehničkim ocjenama, poglavito onih vezanih uz predstavljanje, predaju prijevoda i obavijesti;
- (d) predaju izvještaje predsjedniku odbora o formalnoj prihvatljivosti novo uložene žalbe;
- (e) po potrebi, vođenje zapisnika usmenih postupaka.

Član 6.

Vijećanje

1. Vijećanju prisustvuju samo članovi odbora; predsjednik odbora može, međutim, dopustiti da vijećanju prisustvuju ostali službenici poput osoblja registra ili usmenih prevodilaca. Vijećanje je tajno.
2. Tijekom vijećanja članova odbora mišljenje izvjestitelja sluša se prvo, a mišljenje predsjednika zadnje.

Član 7.

Uslovi glasanja i redosljed

1. Odluke odbora za žalbe donose se većinom glasova njegovih članova. Prilikom neodlučenog glasanja, odlučujući je glas predsjednika odbora.
2. Ukoliko je glasovanje potrebno, glasa se redosljedom koji je utvrđen u članu 6. stavu 2. Suzdržani glasovi nisu dopušteni.

Član 8.

Stupanje na snagu

Ova Uredba stupa na snagu 20. dana od objave u Službenom listu Europske unije.
Ova Uredba u cijelosti obvezuje i neposredno se primjenjuje u svim državama članicama.
Sastavljeno u Bruxellesu, 22. januara 2004.

Za Komisiju

Loyola DE PALACIO

Potpredsjednik

PRILOG
POPIS DISCIPLINA

1. Sljedeće tehničke discipline:

- (i) let/rad mašine
- (ii) struktura
- (iii) hidromehanički sistemi
- (iv) rotor/prijenosni sistemi
- (v) električne naprave/HIRF/udar munje
- (vi) elektronika letjelice/softver
- (vii) pogonski uređaj/sistemi za gorivo
- (viii) sigurnost u kabini/ sistemi za okoliš
- (ix) buka/emisije
- (x) trajna plovidbenost/ direktive o plovidbenosti kako su primijenjene na sljedeće proizvode, njihove dijelove i uređaje:
 - (a) veliki zrakoplovi
 - (b) letjelice s rotorom
 - (c) mali zrakoplovi
 - (d) baloni/ zrakoplovi/ jedrilice/ bespilotne letjelice (UAV)
 - (e) motori /pomoćne pogonske jedinice (APU)/ propeleri.

2. Odobrenja i sistemi kvalitete vezani uz:

- (i) organizacije za konstrukciju
- (ii) organizacije za proizvodnju
- (iii) organizacije za održavanje